

## الفصل التاسع

لا زلنا مع أسطورة الخلق والكرم عمو السيد مساعد أول الوزير (الرائد محمد بك نشأت إسماعيل أركان حرب مديرية أمن الإسكندرية) النبيه والشهم والخطير.. في صيف عام (١٩٧١).. دخلت مكتب سعادته في آخر الطرقة اليمين في الطابق العلوي الأول على الشمال.. تمام يا عمو أنا جيت في الميعاد لمعرفة التشخيص والعلاج.. ده أنت حالتك خطيرة..؟ وستستدعي نقلك بالدوابة أي بالطيارة لغرفة العمليات الرئيسية بالقاهرة بمكتب معالي الوزير ممدوح بك سالم الذي كان من فترة وجيزة محافظ الإسكندرية.. مانا عارفه يا عمو كنت عنده في مكتبه في المحافظة قبل توليه مسئولية الوزارة.. وأعطاني حقنة مُسَكِّنة.. لحين التدخل الجراحي لحالتي المهيبة..؟ أه دا أنت سوابق بقى..! طب والعمل إيه دلوقتي يا عمو؟ حانكفك في شوال ونبعتك بمخصوص سريعاً.. على نقال.. على السيد الجراح العالمي الكبير سعادة الوزير.. ليه يا عمو؟ بعد ما اطلَّع سيادته على الأشعات والتقارير بتاعك.. أصدر أوامره وتعليماته.. بضرورة شحك على هناك.. على طول ولا تروح هنا أو هناك.. عشان سيادته قلقان ومشغول على حالتك المتدهورة.. والمميتة والمتقندلة.. ويا نلحقك.. أو نقول لورثتك.. تعيش أنت..! ورثة إيه يا عمو؟ دول حاييجوا لسعادتك فرحانين ولكتبكم مقبلين.. وسعادتك حاتقول يا ساتر..

وامين.. وتسبب الشغل والمديرية بحالتها وتقول الحمد لله رب العالمين..! عشان بس سحادتك تعرف إني ورايا أسود ورجالة؟ كده.. طيب أنا حاخلي حياتك كلها قلق وهبابة.. خده يا سيادة الضابط (بمكتب عمو) من إيديه وماتسيبهوش إلا أمام مكتب السيد الوزير غداً صباحاً وتجيبيوا معاك في إيدك بعد الكشف.. لاستكمال العلاج هنا..؟

ثاني يوم كنت مُرحّل.. ووصلت للقاهرة.. وعزمت على أخي الكبير.. الضابط بالعلاقات.. على كويابة عصير قصب من محل بالقرب من محطة قطار مصر.. واحتياطياً.. غزت للبائع بالتوصية بالمتنوم؟ واسترددت حرיתי وإطلاق رجلي وإيديا..! وتوجهت لمكتب الوزير..! تيك تاك تيك.. مين..؟ أنا سعيد أمين..! عايز مين.. الباشا جدو الكبير..! بتقول مين.. معالي الوزير.. كل ده من على البوابة..! الضابط اللي على البوابة: امشي يا ابني وبلاش تهريج.. وخلي يومك يعدي على خير.. يا نطوخك.. بكل الأسلحة والطلقات..! أنا عندي ميعاد.. وبلاش العناد.. لحسن سعادتك حايبقي ليك بُعاد..؟ يا نهارك وعمرك اللي مات..؟ واللّه سعادتك كده حاتندم على اللي فات..! فين بطاقتك..؟ اتفضل..! هات..! ترن ترن.. فيه كائن ط. ضابط اسمه سعيد السيد أمين سويلم.. ولسه حايكمل.. لقيته بيكلم نفسه وقام ووقف وكلف أحد الموجودين بالبوابة بسرعة اصطحابي لمكتب

الوزير مع اعتذاره على تأخيري..!! طلعت لقيت والدنا الرائع  
والفريد والحنون.. مدير المكتب نبوي إسماعيل.. واستقبلني بكل  
حفاوة وترحاب.. وقال لي تشرب إيه.. غداء..؟ إيه.. سعادتك  
من فرحتي من حل أزمتي.. ماكلتش يومين.. جابلي شيكولاته  
وبسكويت وشاي باللبن..! خلصتهم في دقيقة.. وقال لي معالي  
الوزير: عايزك اتفضل..؟ كنت عايز أقول لسيادته معكش أي  
فكة عشان لو اتزنقت جوه عند معالي الوزير لأي ظرف طارئ..  
عشان ضابط العلاقات أخذ فلوسي كلها عشان ما تتسرقش أو  
ما تضعش مني في القطر..!

